

刺葛仙翁肘後備急方序



嘗觀范文正曰不為良相則願為良醫而陸宣公之在忠州亦惟手校方書每嘆其濟人之心先後一揆古人之志何如其深且遠也予少不習醫而濟人一念則耿耿于中每見海內方書則購而藏之方之効者則珍而錄之以為庶可濟人之急然以不及見古人竒方為恨

尤愧不能為良醫雖藏之多而無所決
擇也今年之夏偶以巡行至均遊武當
因閱道藏得肘後備急方八卷乃葛稚
川所輯而陶隱居增補之者其方多今
之所未見觀二君之所自為序積以年
歲僅成此編一方一論皆已試而後錄
之尤簡易可以應卒其用心亦勤其選
之亦精矣矧二君皆有道之士非世良

醫可比得其方書而用之中病固不必
為醫可以知藥不必擇方可以知醫其
曰苟能起信可免天橫信其不我欺也
因刻而布之以快予濟人之心云

萬曆二年甲戌秋仲巡按湖廣監察御
史劍江李棧書

葛仙翁肘後備急方序

醫有方古也古以來著方書者無慮數十百家其方殆未可以數計篇帙浩瀚苟無良醫師安所適從况窮鄉遠地有病無醫有方無藥其不罹天折者幾希丹陽葛稚川夷考古今醫家之說驗其方簡要易得鍼灸分寸易曉必可以救人於死者為肘後備急方使有病者得

之雖無韓伯休家自有藥雖無封君達
人可為醫其以備急固宜華陽陶弘景
曰葛之此製利世實多但行之既久不
無謬誤乃著百一方疏于備急之後訛
者正之缺者補之附以炮製服食諸法
纖悉備具仍區別內外他犯為三條可
不費討尋開卷見病其以備急益宜葛
陶二君世共知為有道之士於學無所

不貫於術無所不通然猶積年僅成此
編蓋一方一論已試而後錄之非徒採
其簡易而已人能家置一帙遇病得方
方必已病如歷卞和之肆舉皆美玉入
伯樂之廐無非駿足可以易而忽之邪
葛自序云人能起信可免天橫意可見
矣自天地大變此方湮沒幾絕間一存
者闕以自寶是豈制方本意連帥烏侯

夙多疹疾宦學之餘留心于醫藥前按
察河南北道得此方於平鄉郭氏郭之
婦翁得諸汴之掖庭變亂之際與身存
亡未嘗輕以示人迨今而出焉天也侯
命工刻之以趣其成唯恐病者見方之
晚也雖然方之顯晦而人之生死休感
係焉出自有時而隱痛惻怛如是其急
者不忍人之心也有不忍人之心斯有

不忍人之政矣則侯之仁斯民也豈直
一方書而已乎方之出乃吾仁心之發
見者也因以序見命特書其始末以告
夫未知者至元丙子季秋稷亭段成已
題

葛仙翁肘後備急方序

亦名肘後卒救方
隱居又名百一方

抱朴子丹陽葛稚川曰余既窮覽墳索
以著述餘暇兼綜術數省仲景元化劉
戴祕要金匱綠秩黃素方近將千卷患
其混雜煩重有求難得故周流華夏九
州之中收拾奇異捃拾遺逸選而集之
使種類殊分緩急易簡凡為百卷名曰
玉函然非有力不能盡寫又見周甘唐

阮諸家各作備急既不能窮諸病狀兼
多珍貴之藥豈貧家野居所能立辦又
使人用鍼自非究習醫方素識明堂流
注者則身中榮衛尚不知其所在安能
用鍼以治之哉是使鳧鴈擊擊牛羊搏
噬無以異也雖有其方猶不免殘害之
疾余今採其要約以爲肘後救卒三卷
率多易得之藥其不獲已須買之者亦

皆賤價草石所在皆有兼之以灸灸但
言其分寸不名孔穴凡人覽之可了其
所用或不出乎垣籬之內顧眄可具苟
能信之庶免橫禍焉世俗苦於貴遠賤
近是古非今恐見此方無黃帝倉公和
鵠踰跗之目不能採用安可強乎

華陽隱居補闕肘後百一方序

太歲庚辰隱居曰余宅身幽嶺迄將十載雖每植德施功多止一時之設可以傳方遠裔者莫過於撰述見葛氏肘後救卒殊足申一隅之思夫生人所爲大患莫急於疾疾而不治猶救火而不以水也今輦掖左右藥師易尋郊郭之外已似難值况窮村迥野遙山絕浦其間

唯拱手相看曷若探之囊笥則可庸豎
成醫故備論證候使曉然不滯一披條
領無使過差也尋葛氏舊方至今已二
百許年播於海內因而濟者其效實多
余今重以該要庶亦傳之千祀豈止於
空衛我躬乎舊方都有八十六首檢其
四蛇兩犬不假殊題喉舌之間亦非異
處入塚御氣不足專名雜治一條猶是

諸病部類強致殊分復成失例今乃配
合為七十九首於本文究具都無忖減
復添二十二首或因葛一事增構成篇
或補葛所遺準文更撰具如後錄詳悉
自究先次比諸病又不從類遂具復勞
在傷寒前霍亂置耳目後陰易之事乃
出雜治中兼題與篇名不盡相符卒急
之時難於尋檢今亦次其銓次庶歷然

易曉其解散脚弱虛勞渴痢發背嘔血
多是貴勝之疾其傷寒中風診候最難
分別皆應取之於脉豈凡庸能究今所
載諸方皆灼然可用但依法施治無使
違逆其癰疽金瘡形變甚衆自非具方
未易根盡其婦女之病小兒之病並難
治之方法不少亦載其綱要云凡此諸
方皆是撮其樞要或名醫垂記或累世

傳良或博聞有驗或自用得力故復各
題祕要之說以避文繁又用藥有舊法
亦不復假事事詮詔今通立定格共為
成準凡服藥不言先食者皆在食前應
食後者自各言之凡服湯云三服再服
者要視病源准候或踈或數足令勢力
相及毒利藥皆須空腹補瀉其間自可
進粥凡散日三者當取旦中暮進之四

五服則一日之中量時而分均也凡下
丸散不云酒水飲者本方如此而別說
用酒水飲則是可通用三物服也凡云
分等即皆是丸散隨病輕重所須多少
無定銖兩三種五種皆分均之分兩凡
云丸散之若干分兩者是品諸藥宜多
宜少之分兩非必止於若干分兩假令
日服三方寸七須差止是三五兩藥耳

凡云末之是擣篩如法咬咀者皆細切
之凡云湯煮取三升分三服皆絞去滓
而後酌量也字方中用烏獸屎作矢字
屎作溺字牡鼠亦作雄字乾作干字凡
云錢七者以大錢上全抄之若云半錢
則是一錢抄取一邊爾並用五銖錢也
方寸匕即用方一寸抄之可也刀圭准
如兩大豆炮熬炙洗治諸藥凡用半夏

皆湯洗五六度去滑附子烏頭炮去皮
有生用者隨方言之礬石熬令汁盡椒
皆出汗麥門冬皆去心丸散用膠皆炙
巴豆皆去心皮熬有生用者隨而言之
杏人去尖皮熬生用者言之葶蘆皆熬
皂莢去皮子藜蘆枳殼甘草皆炙大棗
支子擘破巴豆桃杏人之類皆別研搗
如膏乃和之諸角皆屑之麻黃皆去節

凡湯中用芒硝阿膠粘糖皆絞去滓內
湯中更微煮令消紅雪朴硝等皆狀此
而入藥也用麻黃即去節先煮三五沸
掠去沫後乃入餘藥凡如上諸法皆已
具載在余所撰本草上卷中今之人有
此肘後百一者未必得見本草是以復
疏方中所用者載之此事若非留心藥
術不可盡知則安得使之不僻繆也案

病雖千種大略只有三條而已一則府藏經絡因邪生疾二則四支九竅內外交媾三則假為他物橫來傷害此三條者今各以類而分別之貴圖倉卒之時披尋簡易故也今以內疾為上卷外發為中卷他犯為下卷具列之云

上卷三十五首治內病

中卷三十五首治外發病

下卷三十一首治為物所苦病

鹿鳴山續古序

觀夫古方藥品分兩灸穴分寸不類者
蓋古今人體大小或異藏府血脉亦有
差焉請以意酌量藥品分兩古序已明
取所服多少配之或一分為兩或二銖
為兩以蓋當升可也如中卷末紫丸方
代赭赤石脂各一兩巴豆四十杏人五
十枚小兒服一麻子百日者一小豆且

多矣若兩用二銖四紫巴豆四杏人五枚可療十數小兒此其類也灸之分寸取其人左右中指中節可也其使有毒狼虎性藥乃急救性命者也或遇發毒急掘地作小坑以水令滿熟攪稍澄飲水自解名為地漿特加是說於品題之後爾

附廣肘後方序

昔伊尹著湯液之論周公設醫師之屬皆所以拯救民疾俾得以全生而盡年也然則古之賢臣愛其君以及其民者蓋非特生者遂之而已人有疾病坐視其危苦而無以救療之亦其心有所不忍也仰惟國家受天成命統一四海至上以仁覆天下輕稅損役約法省刑蠲

積負柔遠服專務以德養民故人臣奉承于下亦莫不以體國愛民為心惟政府內外宗公協同輔翼以共固天保無疆之業其心則又甚焉於斯時也蓋民罹兵火獲見太平邊境寧而盜賊息矣則人無死於鋒鏑之慮刑罰清而狴犴空矣則人無死於桎梏之憂年穀豐而畜積富矣則人無死於溝壑之患其所

可虞者獨民之有疾病天傷而已思亦有以救之其不在於方書矣乎然方之行於世者多矣大編廣集奇藥羣品自名醫貴胄或不能以兼通而卒具況可以施於民庶哉於是行省乃得乾統間所刊肘後方善本即葛洪所謂皆單行徑易約而已驗籬陌之間顧盼皆藥家有此方可不用醫者也其書經陶隱居

增修而益完矣既又得唐慎微證類本草其所附方皆洽見精取切於救治而卷帙尤為繁重且方隨藥著檢用卒難乃復摘錄其方分以類例而附於肘後隨證之下目之曰附廣肘後方下監俾更加讎次且為之序而刊行之方雖簡要而該病則衆藥多易求而論效則遠將使家自能醫人無夭橫以溥濟斯民

於仁壽之域以上廣國家博施愛物之德其為利豈小補哉皇統四年十月戊子儒林郎汴京國子監博士楊用道謹序

備急方序

其

葛仙翁肘後備急方目錄

卷之一

救卒中惡死方第一

救卒尸蹙死方第二

救卒客忤死方第三

治卒得鬼擊方第四

治卒魘寐不寤方第五

治卒中五尸方第六

治尸注鬼注方第七

治卒心痛方第八

治卒腹痛方第九

治心腹俱痛方第十

治卒心腹煩滿方第十一

卷之二

治卒霍亂諸急方第十二

治傷寒時氣溫病方第十三

治時氣病起諸勞復方第十四

治瘴氣疫癘溫毒諸方第十五

卷之三

治寒熱諸瘧方第十六

治卒發癲狂病方第十七

治卒得驚邪恍惚方第十八

治卒中風諸急方第十九

治卒風瘖不得語方第二十

治風毒脚弱痺滿上氣方第二十一

治服散卒發動困篤方第二十二

治卒上氣咳嗽方第二十三

治卒身面腫滿方第二十四

卷之四

治卒大腹水病方第二十五

治卒心腹癥堅方第二十六

治心腹寒冷食飲積聚結癖方第二十七

治胃膈上痰癢諸方第二十八

治卒患胃痺痛方第二十九

治卒胃反嘔哕方第三十

治卒發黃疸諸黃病方第三十一

治卒患腰脇痛諸方第三十二

治虛損羸瘦不堪勞動方第三十三

治脾胃虛弱不能飲食方第三十四

治卒絕糧失食饑憊欲死方第三十五

卷之五

治癰疽如乳諸毒腫方第三十六

治腸癰肺癰方第三十七

治卒發丹火惡毒瘡方第三十八

治癩癬疥漆瘡諸惡瘡方第三十九

治卒得癩皮毛變黑方第四十

治卒得蟲鼠諸瘻方第四十一

治卒陰腫痛頰卵方第四十二

卷之六

治自赤痛暗昧刺諸病方

治卒耳聾諸病方

治耳為百蟲雜物所入方

治卒食噎不下方

治卒諸雜物鯁不下方

治卒誤吞諸物及患方

治面炮髮禿身臭心昏鄙醜方

卷之七

治為熊虎爪牙所傷毒痛方

治卒為獐犬所咬毒方

治卒毒及狐溺棘所毒痛方

治卒青蛙蝮虺衆蛇所螫方

治蛇瘡敗蛇骨刺人入口繞身諸方

治卒入山草禁辟衆蛇藥術方

治卒蜈蚣蜘蛛所螫方

治卒蠆螫方

治卒蜂所螫方

治卒蠍所螫方

治中蠱毒方

治卒中溪毒方

治卒中射工水弩毒方

治卒中沙虱毒方

治卒服藥過劑煩悶方

治卒中諸藥毒救解方

治食中諸毒方

治防避飲食諸毒方

治卒飲酒大醉諸病方

卷之八

治百病備急丸散膏諸要方

治牛馬六畜水穀疫癘諸病方

葛仙翁肘後備急方目錄

葛仙翁肘後備急方卷之一

救卒中惡死方第一

救卒死或先病痛或常居寢臥奄忽而絕皆是中死救之方

一方取蔥黃心刺其鼻男左女右入七八寸若使目中血出佳扁鵲法同是後吹耳條中葛當言此云吹鼻故別為一法

又方令二人以衣壅口吹其兩耳極則易又可以筒吹之並捧其肩上側身遠之莫臨死人上

又方以蔥葉刺耳耳中鼻中血出者莫怪無血難治

有血是候時當捧兩手忽放之須臾死人自當舉
手撈人言痛乃止男刺左鼻女刺右鼻中令入七
八寸餘大效亦治自縊死與此扁鵲方同

又方以綿漬好酒中須臾置死人鼻中手按令汁入
鼻中并持其手足莫令驚

又方視其上唇裏絃絃者有白如黍米大以針決去
之

又方以小便灌其面數迴即能語此扁鵲方法

又方取皂莢如大豆吹其兩鼻中嚏則氣通矣

又方灸其脣下宛宛中承漿穴十壯大效矣

又方割雄鷄頰取血以塗其面乾復塗并以灰營死
人一周

又方以管吹下部令數人乎吹之氣通則活

又方破白犬以撮心上無白犬白雞亦佳

又方取雄鴨就死人口上斷其頭以熱血灑口中并

以竹筒吹其下部極則易人氣通下即活

又方取牛馬糞尚濕者絞取汁灌其口中令入喉若

口已禁者以物強發之若不可強者乃扣齒下若

無新者以人溺解乾者絞取汁此扁鵲云

又方以繩圍其死人肘腕男左女右畢伸繩從背上

大槌度以下又從此灸橫行各半繩此法三灸各
三即起

又方令爪其病人人中取醒不者捲其手灸下文頭
隨年

又方灸鼻人中三壯也

又方灸兩足大指爪甲聚毛中七壯此華佗法一云

三七壯

又方灸臍中百壯也

扁鵲法又云斷牝尾取血飲之并縛牝以枕之死人
須臾活

又云半夏末如大豆吹鼻中

又方搗女青屑重一錢七開口內喉中以水苦酒立
活

按此前救卒死四方并後尸變事並是魏大夫傳中
正一真人所說扁鵲受長桑公子法尋此傳出世在
葛後二十許年無容知見當是斯法久已在世故或
言楚王或言趙王兼立語次第亦參差故也

又張仲景諸要方搗薤汁以灌鼻中

又方割丹雄雞冠血管吹內鼻中

又方以雞冠及血塗面上灰圍四邊立起

又方猪脂如雞子大苦酒一升煮沸以灌喉中
又方大豆二七枚以雞子白并酒和盡以吞之

救卒死而壯熱者礬石半斤水一斗半煮消以漬脚
令浸踝

救卒死而目閉者騎牛臨面搗薤汁灌之耳中吹皂
莢鼻中立效

救卒死而張目及舌者炙手足兩爪後十四壯了飲
以五毒諸膏散有巴豆者

救卒死而四支不收矢便者馬矢一升水三斗煮取
二斗以洗之又取牛洞一升溫酒灌口中洞者稀

糞也灸心下一寸臍上三寸臍下四寸各一百壯
差

若救小兒卒死而吐利不知是何病者馬矢一丸絞
取汁以吞之無濕者水煮取汁

又有備急三物丸散及裴公膏並在後備急藥條中
救卒死尤良亦可臨時合用之凡卒中惡及尸蹇
皆天地及人身自然陰陽之氣忽有乖離舌隔上下
不通偏竭所致故雖涉死境猶可治而生緣氣未都
竭也當爾之時兼有鬼神於其間故亦可以符術而
獲濟者

附方

扁鵲云中惡與卒死鬼擊亦相類已死者為治皆參

用此方

搗菖蒲生根絞汁灌之立差尸厥之病卒死脉猶動聽其耳中如微語聲股間暖是也亦此方治之孫真人治卒死方以皂角末吹鼻中

救卒死尸蹙方第二

尸蹙之病卒死而脉猶動聽其耳中循循如嘯聲而股間暖是也耳中雖然嘯聲而睛動者故當以尸蹙救之方

以管吹其左耳中極三度復吹右耳三度活

又方搗乾菖蒲以一棗核大著其舌下

又方灸鼻人中七壯又灸陰囊下去下部一寸百壯

若婦人灸兩乳中間又云爪刺人中良久又針人

中至齒立起

此亦全是魏大夫傳中扁鵲法即趙太子之患又張仲景云尸一蹙脉動而無氣氣閉不通故靜然而死也

以菖蒲屑內鼻兩孔中吹之令人以桂屑著舌下又云扁鵲法治楚王效

又方剔左角髮方二寸燒末以酒灌令入喉立起也
又方以繩圍其臂腕男左女右繩從大椎上度下行
脊上灸繩頭五十壯活此是扁鵲秘法

又方熨其兩脇下取竈中墨如彈丸漿水和飲之須
更三四以管吹耳中令三四人更手吹之又小管
吹鼻孔梁上塵如豆著中吹之令入差

又方白馬尾二七莖白馬前脚目二枚合燒之以苦
酒丸如小豆開口吞二丸須臾服一丸

又方針百會當鼻中入髮際五寸針入三分補之針
足大指甲下肉側去甲三分又針足中指甲上各

三分大指之內去端韭葉又針手少陰銳骨之端
各一分

又方灸臆中穴二十八壯

救卒客忤死方第三

客忤者中惡之類也多於道門門外得之令人心腹
絞痛脹滿氣衝心胃不即治亦殺人救之方

灸鼻人中三十壯令切鼻柱下也以水漬粳米取
汁一二升飲之口已禁者以物強發之

又方搗墨水和服一錢匕

又方以銅器若瓦器貯熱湯器著腹上轉冷者撤去

衣服親肉大冷者易以熱湯取愈則止

又方以三重衣著腹上銅器著衣上稍稍少許茅於器中燒之茅盡益之勿頓多也取愈乃止

又方以繩橫度其人口以度其臍去四面各一處灸各三壯令四火俱起差

又方橫度口中折之令上頭著心下灸下頭五壯

又方真丹方寸匕蜜三合和服口噤者折齒下之

扁鵲治忤有救卒符并服鹽湯法恐非庸世所能故不載而此病即今人所謂中惡者與卒死鬼擊亦相類為治參取而用之已死者

搗生菖蒲根絞取汁含之立差

卒忤停尸不能言者桔梗燒二枚末之服

又方末細辛桂分等內口中

又方雞冠血和真朱丸如小豆內口中與三四枚差若卒口噤不開者末生附子置管中吹內舌下即差

矣

又方人血和真朱如梧桐子大二九折齒納喉中令

下

華佗卒中惡短氣欲死灸足兩母指上甲後聚毛中各十四壯即愈未差又灸十四壯前救卒死方三

七壯已有其法

又張仲景諸要方麻黃四兩杏仁七十枚甘草一兩
以水八升煮取三升分令咽之通治諸感忤

又方韭根一把烏梅二十箇茱萸半斤以水一斗煮
之以病人櫛肉中三沸櫛浮者生沉者死煮得三
升與飲之

又方桂一兩生薑三兩梔子十四枚豉五合搗以酒
三升攪微煮之味出去滓頓服取差

飛尸走馬湯巴豆二枚杏仁二枚合綿纏椎令碎著
熱湯二合中指捻令汁出便與飲之炊間頓下飲

差小量之通治諸飛尸鬼擊

又有諸丸散並在備急藥中客者客也忤者犯也謂
客氣犯人也此蓋惡氣治之多愈雖是氣來鬼鬼毒
厲之氣忽逢觸之其衰歇故不能如自然惡氣治之
入身而侵剋藏府經絡差後猶宜更為治以消其餘
勢不爾亟終為患令有時輒發

附方

外臺秘要治卒客忤停尸不能言細辛桂心等分內
口中

又方燒桔梗二兩末米飲服仍吞麝香如大豆許佳

廣利方治卒中客忤垂死麝香一錢重研和醋二合服之即差

治卒得鬼擊方第四

鬼擊之病得之無漸卒著如人刀刺狀胃脇腹內絞急切痛不可抑按或即吐血或鼻中出血或下血一名鬼排治之方

灸鼻下人中一壯立愈不差可加數壯

又方升麻獨活杜桂分等末酒服方寸匕立愈

又方灸臍下一寸三壯

又方灸臍上一寸七壯及兩踵白肉際取差

又方熟艾如鴨子大三枚水五升煮取二升頓服之
又方鹽一升水二升和攪飲之并以冷水噴之勿令即得吐須臾吐即差

又方以粉一撮著水中攪飲之

又方以淳酒吹內兩鼻中

又方斷白犬一頭取熟犬血一升飲之

又方割雞冠血以漚口中令一咽仍破此雞以榆心下冷乃弃之於道邊得烏雞彌佳妙

又方牛子矢一升酒三升煮服之大牛亦可用之

又方刀鞘三寸燒末水飲之

又方燒鼠矢末服如黍米不能飲之以少水和內口

中

又有諸丸散並在備急藥條中今巫實見人忽有被鬼神所擺拂者或犯其行伍或遇相觸突或身神散弱或愆負所貽輕者因而獲免重者多見死亡猶如燕簡董事非為虛也必應死亦不可要自不得不救

爾

附方

古今錄驗療妖魅猶鬼病人不肯言鬼方鹿角屑搗散以水服方寸匕即言實也

治卒魔寐不寤方第五

臥忽不寤勿以火照火照之殺人但痛嚙其踵及足拇指甲際而多唾其面即活又治之方

末皂角管吹兩鼻中即起三四日猶可吹又以毛刺鼻孔中男左女右展轉進之

又方以蘆管吹兩耳并取病人髮二七莖作繩納鼻孔中割雄雞冠取血以管吹入咽喉中大效

又方末竈下黃土管吹入鼻中末雄黃并桂吹鼻中

並佳

又方取井底泥塗目畢令人垂頭於井中呼其姓名

即便起也

又方取韭搗以汁吹鼻孔冬月可掘取根取汁灌於口中

又方以鹽湯飲之多少約在意

又方以其人置地利刀畫地從肩起男左女右令周面以刀鋒刺病人鼻令入一分急持勿動其人當鬼神語求哀乃問阿誰何故來當自乞去乃以指滅向所畫地當肩頭數寸令得去不可不具詰問之也

又方以瓦甑覆病人面上使人疾打破甑則寤

又方以牛蹄或馬蹄臨魘人上亦可治卒死青牛尤

佳

又方擣雄黃細篩管吹納兩鼻中桂亦佳

又方菖蒲末吹兩鼻中又末內舌下

又方以旣帶左索縛其肘後男左女右用餘稍急絞之又以麻縛脚乃詰問其故約勅解之令一人坐頭守一人於戶內呼病人姓名坐人應曰諾在便蘇

卒魘不覺灸足下大指聚毛中二十一壯人喜魘及惡夢者取犬死灰著履中合枕

又方帶雄黃男左女右

又方灸兩足大指上聚毛中灸二十壯

又方用真麝香一子於頭邊

又方以虎頭枕尤佳

辟魘寐方取雄黃如棗核繫左腋下令人終身不魘

寐

又方真赤劉方一赤以枕之

又方作犀角枕佳以青木香內枕中并帶

又方魘治卒魘寐久書此符於紙燒令黑以少水和之內死人口中懸鑑死者耳前打之喚死者名不

過半日即活

魘臥寐不寤者皆魂魄外遊為邪所執錄欲還未得所忌火照火照遂不復入而有燈光中魘者是本由明出但不反身中故耳

附方

千金方治鬼魘不悟卓茨末刀圭起死人

治卒中五尸方第六

五尸者

飛尸通尸風尸沉尸其狀腹痛脹急不得

氣息上衝心胃旁攻兩脇或礫塊涌起或攣引腰脊

兼治之方

灸乳後三寸十四壯男左女右不止更加壯數差
又方灸心下三寸六十壯

又方灸乳下一寸隨病左右多其壯數即差

又方以四指尖其痛處下灸指下際數壯令人痛上

爪其鼻人中又爪其心下一寸多其壯取差

又方破雞子白頓吞之口閉者內喉中搖頓令下立

差

又方破雞子白頓吞七枚不可再服

又方理當陸根熬以囊貯更番熨之冷復易雖有五

尸之名其例皆相似而有小異者飛尸者避走皮膚洞穿藏府每發刺

痛變作無常也遁尸者附骨入肉攻鑿血脉每發不可得近見屍喪聞哭便作也風尸者淫躍四肢不知痛之所在每發昏恍得風雪便作也沉尸者纏結藏府衝心脇每發絞切遇寒冷便作也尸注者舉身沉重精神錯雜常覺昏廢每節氣改變輒致大惡此一條別有治後熨也凡五尸即身中屍鬼接引也共為病害經術甚有消滅之方而非世徒能用今復撰其經要以救其敝方

雄黃一兩大蒜一兩令相和似彈丸許內二合熟酒中服之須臾差未差更作已有癩者常畜此藥也

又方乾薑桂分等末之鹽三指撮熬令青末合水服之即差

又方搗蒺藜子蜜丸服如胡豆二九日三
又方粳米二升水六升煮一沸服之

又方猪肪八合銅器煎小沸投苦酒八合相和頓服
即差

又方掘地作小坎水滿中熟攪取汁服之

又方取屋上四角茅內銅器中以三赤布覆腹著器
布上燒茅令熱隨痛追逐蹠下痒即差若瓦屋削
取四角柱燒之亦得極大神良者也

又方桂一赤薑一兩巴豆三枚合搗末苦酒和如泥
以傅尸處燥即差

又方烏臼根剉二升煮令濃去滓煎汁凡五升則入
水一兩服五合至一升良

又方忍冬莖葉剉數斛煮令濃取汁煎之服如雞子
一枚日二三服佳也

又方燒亂髮熬杏仁等分搗膏和丸之酒服桐子大
三九日五六服

又方龍骨三分藜蘆二分巴豆一分搗和井花水服
如麻子大如法丸

又方漆葉暴乾搗末酒服之

又方鼈肝一具熟煮切食之令盡亦用蒜齏

又方斷鼈頭燒末水服可分為三度當如肉者不盡
後發更作

又方雄黃一分梔子十五枚芍藥一兩水三升煮取
一升半分再服

又方梔子二十七枚燒末服

又方乾薑附子各一兩桂二分巴豆三十枚去心並
生用搗篩蜜和搗萬杵服二丸如小豆大此藥無
所不治

又飛尸入腹刺痛死方凡犀角射罔五注丸並是好
藥別在大方中治卒有物在皮中如蝦蟇宿昔下入
腹中如杙不動搖掣痛不可堪過數日即煞入方
巴豆十四枚龍膽一兩半夏土瓜子各一兩桂一
斤半合搗碎以兩布囊貯蒸熱更番以熨之亦可
羹飲少少服之

此本在雜治中病名曰陰尸得者多死

治尸注鬼注方第七

尸注鬼注病者葛云即是五屍之中尸注又挾諸鬼
邪為害也其病變動乃有三十六種至九十九種大
略使人寒熱淋瀝恍惚默默不的知其所苦而無處
不惡累年積月漸就頓滯以至於死死後復傳之旁

人乃至滅門覺知此候者便宜急治之方

取桑樹白皮曝乾燒為灰得二斗許著甑中蒸令
氣液便下以釜中湯三四斗淋之又淋凡三度極
濃止澄清取二斗以漬赤小豆二斗一宿曝乾
復漬灰汁盡止乃濕蒸令熟以羊肉若鹿肉作羹
進此豆飯初食一升至二升取飽滿微者三四斗
愈極者七八斗病去時體中自覺痠痒淫淫或若
根本不拔重為之神驗也

又方桃人五十枚破研以水浸取四升一服盡當吐
止病不盡三兩日更作若不吐非注

又方杜衡一兩莖一兩人參半兩許瓠子二七枚松
蘿六銖赤小豆二七枚搗末散平旦溫服方寸七
晚當吐百種物若不盡後更服之也

又方瀨肝一具陰乾搗末水服方寸七日三一具未
差更作姚云神良

又方朱砂雄黃各一兩鬼白茵草各半兩巴豆四十
枚去心皮蜈蚣兩枚搗蜜和丸服如小豆不得下
服二丸亦長將行之姚氏燒髮灰熬杏仁紫色分
等搗如脂猪脂和酒服梧桐子大日三服差

又有華佗狸骨散龍牙散羊脂丸諸大藥等並在大

方中及成帝所受淮南丸並療瘕易滅門女子小兒
多注車注船心悶亂頭痛吐有此瘕者宜辟方

車前子車下李根皮石長生徐長卿各數兩分等
麤搗作方囊貯半合繫衣帶及頸若注船下暴慘
以和此共帶之又臨入船刺取此船自燒作屑以
水服之

附方

子母秘錄治尸注燒亂髮如雞子大為末水服之差
食醫心鏡主傳尸鬼氣咳嗽瘡癬注氣血氣不通日
漸羸瘦方桃人一兩去皮大杵碎以水一升半煮

汁著米煮粥空心食之

治卒心痛方第八

治卒心痛桃白皮煮汁宜空腹服之

又方桂末若乾薑末二藥並可單用溫酒服方寸七
須臾六七服差

又方驢矢絞取汁五六合及熱頓服立定

又方東引桃枝一把切以酒一升煎取半升頓服大
效

又方生油半合溫服差

又方黃連八兩以水七升煮取一升五合去滓溫服

五合每日三服

又方當戶以坐若男子病者令婦人以一椀水以飲之若婦人病者令男子以一椀水以飲之得新汲水尤佳又以蜜一分水二分飲之益良也

又方敗布裹鹽如彈丸燒令赤末以酒一盞服之

又方煮三沸湯一升以鹽一合攪飲之若無火作湯亦可用水

又方閉氣忍之數十度并以手大指按心下宛宛中取愈

又方白艾成熟者三升以水三升煮取一升去滓頓

服之若為客氣所中者當吐之虫物

又方苦酒一椀雞子一枚著中合攪飲之好酒亦可用

又方取竈下熟灰篩去炭分以布囊貯令灼灼爾便更番以熨痛上冷更熬熱

又方蒸大豆若煮之以囊貯更番熨痛處冷復易之
又方切生薑若乾薑半升以水二升煮取一升去滓

頓服

又方灸手中央長指端三壯

又方好桂削去皮搗篩溫酒服三方寸匕不差者須

史可六七服無桂者未乾薑佳

又方橫度病人口折之以度心厭下灸度頭三壯

又方畫地作五行字撮中央土以水一升攪飲之也

又方吳茱萸二升生薑四兩豉一升酒六升煮三升
半分三服

又方人參桂心梔子擘甘草炙黃芩各一兩水六升
煮取二升分三服奇效

又方桃人七枚去皮尖熟研水合頓服良亦可治三
十年患

又方附子二兩炮乾薑一兩搗蜜丸服四九如梧子

大日三

又方吳茱萸一兩半乾薑准上桂心一兩白朮二兩
人參橘皮椒去閉口及子汗甘草炙黃芩當歸桔

梗各一兩附子一兩半炮搗篩蜜和為丸如梧子

大日三稍加至十九十五丸酒飲下飯前食後任

意效驗

又方桂心八兩水四升煮取一升分三服

又方苦參三兩苦酒升半煮取八合分再服亦可用

水無煮者生亦可用

又方龍膽四兩酒三升煮取一升半頓服

又方吳茱萸五合桂一兩酒二升半煎取一升分二服效

又方吳茱萸二升生薑四兩豉一升酒六升煮取二升半分為三服

又方白雞一頭治之如食法水三升煮取二升去雞煎汁取六合內苦酒六合入真珠一錢復煎取六合內末麝香如大豆二枚頓服之

又方桂心當歸各一兩梔子十四枚搗為散酒服方寸匕日三五服亦治久心病發作有時節者也

又方桂心二兩烏頭一兩搗篩蜜和為丸一服如梧

子大三丸漸加之

暴得心腹痛如刺方苦參龍膽各二兩升麻梔子各三兩苦酒五升煮取二升分二服當大吐乃差

治心疝發作有時激痛難忍方真射筒吳茱萸分等搗末蜜和丸如麻子服二九日三服勿喫熟食

又方灸心鳩尾下一寸名巨闕及左右一寸並百壯又與物度頸及度脊如之令正相對也凡灸六處

治久患常痛不能飲食頭中疼重方烏頭六分椒六分乾薑四分搗末蜜丸酒飲服如大豆四九稍加之

又方半夏五分細辛五分乾薑二分人參三分附子一分搗末苦酒和丸如梧子大酒服五九日三服
治心下牽急懊痛方桂三兩生薑三兩枳實五枚水五升煮取三升分三服亦可加水二兩膠飴半斤
治心肺傷動冷痛方桂心二兩猪腎二枚水八升煮取三升分三服

又方附子二兩乾薑一兩蜜丸服四九如梧子大日三服

治心痺心痛方蜀椒一兩熬令黃末之以狗心血丸之如梧子服五九日五服

治心下堅痛大如椀邊如旋拌名為氣分飲水所結方枳實七枚炙朮三兩水一斗煮取三升分為三服當稍軟也

若心下百結積聚去痛者方吳茱萸末一升真射蔴如彈丸一枚合搗以雞子白和丸丸如小豆大服二丸即差

治心痛多唾似有虫方取六畜心生切作十四瓣刀縱橫各割之以真丹一兩粉肉割中且悉吞之入雄黃射香佳

饑而心痛者名曰饑疝龍膽附子黃連分等搗篩服

一錢七日三度服之

附方

藥性論主心痛中惡或連腰臍者

鹽如雞子大青布裹燒赤內酒中頓服當吐惡物
拾遺序延胡索止心痛末之酒服

聖惠方治又心痛時發不定多吐清水不下飲食以

雄黃二兩好醋二升慢火煎成膏用乾蒸餅丸如

梧桐子大每服七丸薑湯下

又方治九種心痛妨悶用桂心一分為末以酒一大

盞煎至半盞去滓稍熱服立效

又方治寒疝心痛四肢逆冷全不飲食用桂心二兩

為散不計時候熱酒調下一錢七

外臺秘要治卒心痛乾薑為末水飲調下一錢

又方治心痛當歸為末酒服方寸匕

又必效治蝟心痛熊膽如大豆和水服大效

又方取鰻鱧魚淡炙令熟與患人食一二枚永差飽

食彌佳

經驗方治四十年心痛不差黍米淘汁溫服隨多少

經驗後方治心痛薑黃一兩桂糠三兩為末醋湯下

一錢七

簡要濟衆治九種心痛及腹脇積聚滯氣筒子乾漆
二兩搗碎炒煙出細研醋煑麩糊和丸如梧桐子
大每服五丸至七丸熱酒下醋湯亦得無時服
姚和衆治卒心痛郁李人三七枚爛嚼以新汲水下
之飲溫湯尤妙須臾痛止却煎薄鹽湯熱呷之
兵部手集治心痛不可忍十年五年者隨手效以小
蒜醱醋煑頓服之取飽不用著鹽

治卒腹痛方第九

治卒腹痛方書舌上作風字又畫紙上作兩蜈蚣相
交吞之

又方搗桂末服三寸七苦酒人參上好乾薑亦佳
又方粳米二升以水六升煑二七沸飲之
又方食鹽一大把多飲水送之忽當吐即差
又方掘土作小坎水滿坎中熟攪取汁飲之
又方令人騎其腹溺臍中
又方米粉一升水二升和飲
又方使病人伏臥一人跨上兩手抄舉其腹令病人
自縱重輕舉抄之令去床三尺許便放之如此二
七度止拈取其脊骨皮深取痛引之從龜尾至頂
乃止未愈更為之

又方令臥枕高一尺許拄膝使腹皮踈氣入胃令人
抓其臍上三寸便愈能乾咽吞氣數十遍者彌佳
此方亦治心痛此即伏氣

治卒得諸疝小腹及陰中相引痛如絞自汗出欲死
方搗沙參末篩服方寸匕立差

此本在雜治中謂之寒疝亦名陰疝此治不差可服
諸利丸下之作走馬湯亦佳

治寒疝腹痛飲食下唯不覺其流行方椒二合乾薑
四兩水四升煮取二升去滓內飴一斤又煎取半
分再服數數服之

又方半夏一升桂八兩生薑一升水六升煮取二升
分為三服

治寒疝來去每發絞痛方吳茱萸三兩生薑四兩豉
二合酒四升煮取二升分為二服

又方附子一枚椒二百粒乾薑半兩半夏十枚大棗
三十枚粳米一升水七升煮米熟去滓一服一升
令盡

又方肉桂一斤吳茱萸半升水五升煮取一升半分
再服

又方牡蠣甘草桂各二兩水五升煮取一升半再服

又方宿烏雞一頭治如食法生地黃七斤合細剉之
著甑蔽中蒸銅器承須取汁清旦服至日晡令盡
其間當下諸寒癖訖作白粥漸食之久疝者下三
劑

附方

博濟方治冷熱氣不和不思飲食或腹痛疝刺山梔
子川烏頭等分生搗為末以酒糊丸如梧桐子大
每服十五丸炒生薑湯下如小腸氣痛炒茴香葱
酒任下二十九

經驗方治元藏氣發久冷腹痛虛瀉

應急大效玉粉丹生硫黃五兩青鹽一兩已上袞細
研以蒸餅為丸如菉豆大每服五丸熱酒空心服
以食壓之

子母秘錄治小腹疼青黑或亦不能喘苦參一兩醋
一升半煎八合分二服

聖惠方治寒疝小腹及陰中相引痛自汗出以丹參
一兩杵為散每服熱酒調下二錢七佳

治心腹俱痛方第十

治心腹俱脹痛短氣欲死或已絕方取梔子十四枚
豉七合以水二升先煮豉取一升二合絞去滓內

梔子更煎取八合又絞去滓服半升不愈者盡服之

又方浼小衣飲其汁一二升即愈

又方桂二兩切以水一升二合煮取八合去滓頓服無桂者著乾薑亦佳

又方烏梅二七枚以水五升煮一沸內大錢二七枚煮得二升半強人可頓服羸人可分為再服當下便愈

又方萊菔二兩生薑四兩豉三合酒四升煮取二升分為三服即差

又方乾薑一兩巴豆二兩搗蜜丸一服如小豆二丸當吐下差

治心腹相連常脹痛方狼毒二兩附子半兩搗篩蜜

丸如梧子大日一服一丸二日二丸三日後服三

丸再一丸至六日服三丸自一至三以常服即差

又方吳茱萸一合乾薑四分附子細辛人參各二分

搗篩蜜丸如梧子大服五丸日三服

凡心腹痛若非中惡霍亂則是皆宿結冷熱所為今此方可採以救急差後要作諸大治以消其根源也

附方

梅師方治心腹脹堅痛悶不安雖未吐下欲死以益
五合水一升煎令消頓服自吐下食出即定不吐
更服

孫真人方治心腹俱痛以布裹椒薄注上火熨令椒
汗出良

十全方心脾痛以高良薑細剉炒杵末米飲調下
錢七立止

治卒心腹煩滿方第十一

治卒心腹煩滿又胃脇痛欲死方以熱湯令灼灼爾
漬手足復易祕方

又方青布方寸廉角三分亂髮灰二錢七以水二升
煮令得一升五合去滓盡服之

又方劉薏苡根濃煮取汁服三升

又方取比輪錢二十枚水五升煮取三沸日三服

又方搗香菜汁服一二升水煮乾薑亦佳

又方即用前心痛支子豉湯法差

又方黃芩一兩杏仁二十枚牡蠣一兩水三升煮取
一升頓服

治厥逆煩滿常欲嘔方小草桂細辛乾薑椒各二兩
附子二兩炮搗蜜和丸服如桐子大四九

治卒吐逆方灸乳下一寸七壯即愈

又方灸兩手大拇指內邊爪後第一文頭各一壯又灸兩手中央長指爪下一壯愈

此本雜治中其病亦是痰壅霍亂之例兼宜依霍亂條法治之人卒在此上條患者亦少皆因他病兼之耳或從傷寒未復或從霍亂吐下後虛燥或是勞損服諸補藥痞滿或觸寒熱邪氣或食飲協毒或服藥失度並宜各循其本源為治不得專用此法也

附方

千金方治心腹脹短氣以草豆蔻一兩去皮為末以

木瓜生薑湯下半錢

斗門方治男子女人久患氣脹心悶飲食不得因食不調冷熱相擊致令心腹脹滿方厚朴火上炙令乾又蘸薑汁炙直待焦黑為度搗篩如麩以陳米飲調下二錢七日三服良亦治反胃止瀉甚妙

經驗方治食氣遍身黃腫氣喘食不得心胃滿悶

不蛀皂角去皮子塗好醋炙令焦為末一錢七巴

豆七枚去油膜二件以淡醋及研好墨為丸如麻

子大每服三丸食後陳橘皮湯下日三服隔一日

增一丸以利為度如常服消酒食

梅師方治腹滿不能服藥煨生薑綿裹內下部中冷
即易之

聖惠方治肺藏壅熱煩悶新百合四兩蜜半盞和蒸
令軟時時含一棗大嚙津

葛仙翁肘後備急方卷之一

葛仙翁肘後備急方卷之二

陸二

治卒霍亂諸急方第十二

凡所以得霍亂者多起飲食或飲食生冷雜物以肥
膩酒醢而當風復濕薄衣露坐或夜臥失覆之所致
初得之便務令煖以炭火布其所臥下大熱減之
又並蒸被絮若衣絮自苞冷易熱者亦可燒地令
熱水沃敷薄布席臥其上厚覆之亦可作灼灼尔
熱湯著甕中漬足令至膝并銅器貯湯以著腹上
衣藉之冷復易亦可以熨斗貯火著腹上如此而
不淨者便急灸之但明察次第莫為亂灸須有其

病乃隨病灸之未有病莫預灸灸之雖未即愈要
萬不復死矣莫以灸不即而止灸霍亂艾丸苦不
大壯數亦不多本方言七壯為可四五十無不便
火下得活服舊方用理中丸及厚朴大豆豉通脉
半夏湯先輩所用藥皆難得今但疏良灸之法及
單行數方用之有效不減於貴藥已死未久者猶
可灸

餘藥乃可難備而理中丸四順厚朴諸湯可不預合
每向秋月常買自隨

卒得霍亂先腹痛者灸臍上十四壯名太倉在心厭

下四寸更度之

先洞下者灸臍邊二寸男左女右十四壯甚者至三

十四壯名大腸募洞者宜瀉

先吐者灸心下一寸十四壯又并拍下痢不止上氣

灸五十壯名巨闕正心厭尖頭下一寸是也

先手足逆冷者灸兩足內踝上一尖骨是也兩足各

七壯不愈加數名三陰交在內踝尖上三寸是也

轉筋者灸蹶心當拇指大聚筋上六七壯名涌泉又

灸足大指下約中一壯神驗

又方灸大指上爪甲際七壯

轉筋入腹痛者令四人捉手足灸臍左二寸十四灸
股中大筋上去陰一寸

若腕者灸手腕第一約理中七壯名心主當中指
下利不止者灸足大指本節內側寸白肉際左右各

七壯名大都

乾嘔者灸手腕後三寸兩筋間是左右各七壯名間
使若正厥嘔絕灸之便通

小品方起死

吐且下利者灸兩乳連黑外近腹白肉際各七壯亦
可至二十七壯

若吐止而利不止者灸臍一夫納中七壯又云臍下
一寸二十七壯

若煩悶溲滿者灸心厭下三寸七壯名胃管

又方以鹽內臍中上灸二十七壯

若遶臍痛急者灸臍下三寸三七壯名關元良

治霍亂神祕起死灸法以物橫度病人人中屈之從
心鳩尾飛度以下灸先灸中央畢更橫灸左右也

又灸脊上以物圍令正當心厭又夾脊左右一寸
各七壯是腹背各灸三處也

華佗治霍亂已死上屋喚魂又以諸治皆至而猶不

差者

捧病人腹臥之伸臂對以繩度兩頭肘失頭依繩下夾背脊大骨宗中去脊各一寸灸之百壯不治者可灸肘椎已試數百人皆灸畢即起坐佗以此術傳子孫代代皆秘之

右此前並是灸法

治霍亂心腹脹痛煩滿短氣未得吐下方

鹽二升以水五升煮取二升頓服得吐愈

又方生薑若乾薑一二升咬咀以水六升煮三沸頓服若不即愈更可作無新藥煮滓亦得

又方飲好苦酒三升小老羸者可飲一二升

又方溫酒一二升以蠟如彈丸一枚置酒中消乃飲無蠟以鹽二方寸匕代亦得

又方桂屑半升以煖飲二升和之盡服之

又方濃煮竹葉湯五六升令灼已轉筋處

又方取楠若樟木大如掌者削之以水三升煮三沸去滓令灼之也

又方服乾薑屑三方寸匕

又方取蓼若葉細切二升水五升煮三沸頓服之煮乾蘇若生蘇汁即亦佳

又方小蒜一升火咀以水三升煮取一升頓服之
又方以煖湯漬小蒜五升許取汁服之亦可

又方以人血合丹服如梧子大二丸

又方生薑一斤切以水七升煮取二升分為三服

又方取賣解家机上垢如雞子大溫酒服之差

又方飲竹瀝少許亦差

又方乾薑二兩甘草二兩附子一兩水三升煮取一
升內猪膽一合相和分為三服

又方蘆蓬草一大把濃煮飲二升差

若轉筋方燒鐵令赤以灼踵白肉際上近後當縱鐵

以隨足為留停令成瘡兩足皆爾須臾間熱入腹
不復轉筋便愈可脫刀燒蝦尾用之即差

又方煮苦酒三沸以摩之合少粉尤佳以絮胎縛從

當膝下至足

又方燒梔子二七枚研末服之

又方桂半夏等分末方寸七水一升和服之差

又方生大豆屑酒和服方寸七

又方燒蜈蚣膏傳之即差

若轉筋入腸中如欲轉者

取雞矢白一寸水六合煮三沸頓服之勿令病者

知之

又方苦酒煮衣絮絮中令溫從轉筋處裹之

又方燒編薦索三撮仍酒服之即差

又方釜底黑末酒服之差

若腹中已轉筋者

當倒擔病人頭在下勿使及地腹中平乃止

若兩臂脚及胃脇轉筋

取鹽一升半水一斗煮令熱灼爾漬手足在胃

脇者湯洗之轉筋入腹中倒擔病人令頭在下腹

中平乃止若極者手引陰陰縮必死猶在倒擔之

可治耳

若注痢不止而轉筋入腹欲死

生薑二兩累擘破以酒升半煮合三四沸頓服之

差

治霍亂吐下後心腹煩滿方

梔子十四枚水三升煮取二升內豉七合煮取一

升頓服之嘔者加橘皮二兩若煩悶加豉一升甘

草一兩蜜一升增水二升分為三服

治霍亂煩躁卧不安穩方

蔥白二十莖大棗二十枚水三升煮取二升頓服

之

治霍亂吐下後大渴多飲則煞人方

以黃米五升水一斗煮之令得三升清澄稍稍飲之莫飲餘物也

崔氏云理中丸方

甘草三兩乾薑人參白朮各一兩搗下篩蜜丸如彈丸覺不住更服一枚須臾不差仍溫湯一斗以麋肉中服之頻頻三五度令差亦可用酒服

四順湯治吐下腹乾嘔手足冷不止

乾薑甘草人參附子各二兩水六升煮取三升半

分為三服若下不止加龍骨一兩腹痛甚加當歸二兩胡洽用附子一枚桂一兩人霍亂亦不吐瀉但四支脉沉肉冷汗出渴者即差

厚朴湯治煩嘔腹脹

厚朴四兩炙桂二兩枳實五枚炙生薑三兩以水六升煮取二升分為三服

凡此湯四種是霍亂諸患皆治之不可不合也霍亂若心痛尤甚者此為挾毒兼用中惡方治之

附方

孫真人治霍亂

以胡椒三四十粒以飲吞之

斗門方治霍亂

用黃杉木劈開作片一握以水濃煎一盞服之

外臺秘要治霍亂煩躁

燒亂髮如雞子大盞湯三升和服之不吐再服

又方治霍亂腹痛吐瀉

取桃葉三升切以水五升煮取一升三合分溫二

服

梅師方治霍亂心痛利無汗

取梨葉枝一大握水二升煎取一升服

又方治霍亂後煩躁卧不安穩

蔥白二十莖大棗二十枚以水三升煎取二分

服

兵部手集救人霍亂頗有神效

漿水稍酸味者煎乾薑屑呷之夏月腹肚不調煎

呷之差

孫用和治大瀉霍亂不止

附子一枚重七錢炮去皮臍為末每服四錢水兩

盞盞半錢煎取一盞溫服立止集效方治吐瀉不

止或取轉多四肢發厥虛風不省人事服此四肢

漸暖神識便省

回陽散 天南星為末每服三錢入京棗三枚水一盞
半同煎至八分溫服未省再服聖惠方治霍亂轉
筋垂死

敗蒲席一握細切漿水一盞煮汁溫頓服

又方治肝虛轉筋

用赤蓼莖葉切三合水一盞酒三合煎至四合去
滓溫分二服

又方治肝風虛轉筋入腹

以鹽半斤水煮少時熟漬之佳

孫尚藥治脚轉筋痠痛攣急者

松節一兩細剉如米粒乳香一錢右件藥用銀石
器內慢火炒令焦只留三分性出火毒研細每服
一錢至二錢熱木瓜酒調下應時筋病皆治之

古今錄驗方治霍亂轉筋

取蓼一手把去兩頭以水二升半煮取一升半頓
服之

治傷寒時氣溫病方第十三

治傷寒及時氣溫病及頭痛壯熱脉大始得一日方
取旨允根葉合搗三升許和之真丹一兩水一升

合煮絞取汁頓服之得吐便差若重一升盡服厚覆取汁差

又方小蒜一升搗取汁三合頓服之不過再作便差
又方烏梅二十七枚鹽五合以水三升煮取一升去滓頓服之

又方取生杼木削去黑皮細切裹白一升以水二升五合煎去滓一服八合三服差

又方取朮九子二十七枚以水五升按之令熟去滓盡服汁當吐下愈

又方雞子一枚著冷水半升攪與和乃復煮三升水

極令沸以向所和水投湯中急攪令相得適寒溫頓服取汗

又方以真丹塗身令遍面向火坐令汗出差

又方取生蘘荷根葉合搗絞取汁服三四升

又方取乾艾三斤以水一斗煮取一升去滓頓服取汗

又方鹽一升食之以湯送之腹中當絞吐便覆取汗便差

又方取比輪錢一百五十七枚以水一斗煮取七升服汁盡之須臾復以五升水更煮令得一升以水

二升投中合令得三升出錢飲汁當吐毒出也

又方取猪膏如彈丸者溫服之日三服三日九服

又方烏梅三十枚去核以豉一升苦酒三升煮取一

升半去滓頓服

又傷寒有數種人不能別令一藥盡治之者若初覺

頭痛肉熱脉洪起一二日便作葱豉湯用葱白一

虎口豉一升以水三升煮取一升頓服取汗不汗

復更作加葛根二兩升麻三兩五升水煎取二升

分再服必得汗若不汗更加麻黃二兩又用蔥湯

研米二合水一升煮之少時下鹽豉後內蔥白四

物令火煎取三升分服取汗也

又方豉一升小男溺三升煎取一升分為再服取汗

又方葛根四兩水一斗煎取三升乃內豉一升煎取

升半一服搗生葛汁服一二升亦為佳也

若汗出不歇已三四日胃中惡欲令吐者

豉三升水七升煮取二升半去滓內蜜一兩又煮

三沸頓服安臥當得吐不差更服取差秘法傳於

子孫也

又方生地黃三斤細切水一斗煮取三升分三服亦

可服藜蘆吐散及苦參龍膽散

若已五六日以上者

可多作青竹瀝少煎令減為數數飲之厚覆取汗
又方大黃黃連黃檗梔子各半兩水八升煮六七沸
內豉一升蔥白七莖煮取三分服宜老少
又方苦參二兩黃芩二兩生地黃半斤水八升煮取
一升分再服或吐下毒則愈

若已六七日熱極心下煩悶狂言見鬼欲起走

用乾菜菔三升水二升煮取一升後去滓寒溫服
之得汗便愈此方恐不失必可用也祕之

又方大蠅一升破去以人溺煮令熟去滓服之直生

絞汁及水煎之並善又絞糞汁飲數合至一二升
謂之黃龍湯陳久者佳

又方取白犬從背破取血破之多多為佳當及熱以
薄絹上冷乃去之此治垂死者活無白犬諸純色
者亦可用之

又方取桐皮削去上黑者細擘之長斷令四寸一束
以酒五合以水一升煮取一升去滓頓服之當吐
下青黃汁數升即差

又方雞子三枚芒硝方寸七酒三合合攪散消盡服
之

又方黃連三兩黃檗黃芩各二兩梔子十四枚水六升煎取二升分再服治煩嘔不得眠

治時氣行垂死破棺千金煮湯苦參一兩咬咀以酒二升半舊方用苦參酒煮令得一升半去滓適寒溫盡服之當問苦寒吐毒如落膠便愈

又方大錢百文水一斗煮取八升內麝香當門子李子大末稍稍與飲至盡或汗或吐之

治溫毒發斑大瘦難救黑膏生地黃半斤切碎好豉一升猪脂二斤合煎五六沸令至三分減一絞去滓末雄黃麝香如大豆者內中攪和盡服之毒從

皮中出愈

又方用生蠟蠟正爾破腹去腸乃搗吞食之得五月

五日乾者燒末亦佳矣

黑奴丸胡洽小品同一名水解丸又一方加小麥黑敦一兩名為麥奴丸支同此注

麻黃二兩大黃二兩黃芩一兩芒硝一兩釜底墨一兩竈突墨二兩梁上塵二兩搗蜜丸如彈丸新汲水五合末一丸頓服之若渴但與水須臾寒寒了汗出便解日移五赤不覺更服一丸此治五六日胃中大熱口噤名為壞病不可醫治用此黑奴

丸

又方大青四兩甘草膠各二兩豉八合以水一斗煮
二物取三升半去滓內豉煮三沸去滓乃內膠分
作四服盡又合此治得至七八日發汗不解及吐
下大熱甚佳

又方大黃三兩甘草二兩麻黃二兩杏仁三十枚芒
硝五合黃芩一兩巴豆二十粒熬搗蜜丸和如大
豆服三丸當利毒利不止米飲止之家人視病者
亦可先服取利則不相染易也此丸亦可預合置
麻黃解肌一二日便服之

麻黃甘草升麻芍藥石膏各一兩杏仁三十枚且
齒三枚末之以水三升煮取一升頓服覆取汗出
即愈便食豉粥補虛即宜也

又方麻黃二兩苓桂各一兩生薑三兩以水六升煮
取二升分為四服

亦可服葛根解肌湯葛根四兩芍藥二兩麻黃大青
甘草黃芩石膏桂各一兩大棗四枚以水五升煮
取二升半去滓分為三服微取汗

三日已上至七八日不解者可服小柴胡湯柴胡八
兩人參甘草黃芩各三兩生薑八兩無者乾薑三

兩半夏五兩湯洗之大棗十二枚水九升煮取二升半分為三服微覆取汗半日須臾便差若不好更作一劑

若有熱實得汗不解復滿痛煩躁欲謬語者可服大柴胡湯方柴胡半斤大黃二兩黃芩三兩芍藥二兩枳實十枚半夏五兩洗之生薑五兩大棗十二枚水一斗煮取四升當分為四服當微利也

此四方最第一急瀕者若幸可得藥便可不營之保無死憂諸小治為防以窮極耳若病失治及治不差十日已上皆名壞病唯應服大小鼈甲湯此方藥分兩乃以而種數多非備急家所辦故不載凡傷寒發汗皆不可使流離過多一服得微汗汗絮便止未止粉之勿當風初得傷寒使身重腰背痛煩悶不已脉浮面赤斑斑如錦文喉咽痞或下痢或狂言欲走此名中陽毒五日可治過此死宜用此方

雄黃甘草升麻當歸椒桂各一分水五升煮取二升半分三服溫覆取汗服後不汗更作一劑

若身重背強螻蟻如被打腹中痛心下強短氣嘔逆脣青面黑四肢冷脉沉細而緊數此名中陰毒五日可治過此死用此方

甘草升麻各二分當歸椒各一分鱉甲一兩以水
五升煮取二升半分三服溫覆取汗汗不出湯煮
更作也

陰毒傷口鼻冷者乾薑桂各一分末溫酒三合服之
當大熱差凡陰陽二毒不但初得便尔或一二日變
作者皆以今藥治之得此病多死治熱病不解而下
痢因篤欲死者服此

大青湯方大青四兩甘草三兩膠二兩豉八合赤石
脂三兩以水一斗煮取三升分三服盡更作日夜
兩劑愈

又方但以水五升豉一升梔子十四枚韭白一把煮
取三升半分為三服

又方龍骨半斤搗碎以水一斗煮取五升使極冷稍
稍飲其間或得汗即愈矣

又方黃連當歸各二兩乾薑一兩赤石脂二兩蜜丸
如梧子服二十九日三夜再

又方黃連二兩熟艾如鴨卵大以水二斗煮取一升
頓服立止

大行諸痢悉主之黃連三兩黃檗當歸龍骨各二兩
以水六升煮取二升去滓入蜜七合又火煎取一

升半分為三服效

天行毒病挾熱腹痛下痢升麻甘草黃連當歸芍藥
桂心黃芩各半兩以水三升煮取一升服之當良
天行四五日大下熱痢黃連黃芩各三兩龍骨三兩
艾如雞子大以水六升煮取二升分為二服忌食
猪肉冷水

若下膿血不止者赤石脂一斤乾薑一兩粳米一升
水七升煮米熟去滓服七合日三

又方赤石脂一斤乾薑二兩水五升煮取三升分二
服若絞臍痛加當歸一兩芍藥二兩加水一升也

若大便堅閉令利者大黃四兩厚朴二兩枳實四枚
以水四升煮取一升二合分再服得通者止之

若十餘日不大便者服承氣丸大黃杏仁各二兩枳
實一兩芒硝一合搗蜜和丸如彈丸和湯六七合
服之未通更服

若下痢不能食者黃連一升烏梅二十枚炙燥並得
搗末燻如棊子大蜜一升合於微火上令可丸九
如梧子大一服二九日三

若小腹滿不得小便方細末雌黃蜜和丸取如棊核
大內溺孔中令半寸亦以竹管注陰令痛朔之通

又方末滑石三兩亭薺子一合水二升煮取七合服
又方搗生蔥薄小腹上參易之

治胃脇痞滿心塞氣急喘急方人參朮各一兩枳實
二兩乾薑一兩搗蜜和丸一服一枚若嗽加括萋
二兩吐加牡蠣二兩日夜服五六丸不愈更服

毒病攻喉咽腫痛方切當陸炙令熱以布藉喉以熨
布上冷復易

又方取真箇茄爪甲大內口中以牙小嚼汁以漬喉
當微覺異為佳也

毒病後攻目方煮蜂巢以洗之日六七度佳

又方冷水漬青布以掩之

若鼻中痛者燒敗二七粒末內管鼻中以吹之

治傷寒嘔不止方甘草一兩升麻半兩生薑三兩橘
皮二兩水三升煮取二升頓服之愈

又方乾薑六分附子四分末以苦酒丸如梧子大一
服三九日三服

治傷寒嘔不止方甘草三兩橘皮一升水五升煮取
三升分服日三取差

又方熟洗半夏末服之一錢一服

又方赤蘇一把水三升煮取二升稍稍飲

又方乾薑六分附子四分末苦酒丸如梧子大服三
丸日三服

比歲有病時行仍發瘡頭面及身須臾周匝狀如火
瘡皆戴白漿隨決隨生不即治劇者多死治得差後
瘡癩紫黑彌歲方滅此惡毒之氣世人云永徽四年
此瘡從西東流遍于海中煮葵菜以蒜蓋啖之即止
初患急食之少飯下菜亦得以建武中於南陽擊虜
所得仍呼為虜瘡諸醫參詳作治用之有效方

正蜂蜜通身上摩亦可以蜜煎升麻并數數食

又方以水濃煮升麻綿沾洗之苦酒漬彌好但痛難

忍

其餘治猶依傷寒法但每多作毒意防之用地黃黑
膏亦好

治時行病發黃方茵陳六兩大黃二兩梔子十二枚

以水一斗先煮茵陳取五升去滓內二物又煮取

三升分四服亦可兼取黃疸中雜治法差

比歲又有虜黃病初唯覺四體沉沉不快須臾見眼
中黃漸至面黃及舉身皆黃急令溺白紙紙即如藥
染者此熱毒已入內急治之若初覺便作苳蒂赤豆
散吹鼻中鼻中黃汁出數升者多差若已深應看其

舌下兩邊有白脉弥弥處蘆刀割破之紫血出數升亦歇然此須慣解剖者不解割忽傷亂舌下青脉血出不止便煞人方可燒紡軋鐵以灼此脉令焦兼瓜蒂雜巴豆搗為丸服之大小便亦去黃汁破灼已後禁諸雜食又云有依黃坐黃復須分別之方

切竹煑飲之如飲

又方搗生瓜根絞取汁飲一升至二三升

又方醋酒浸雞子一宿吞其白數枚

又方竹葉切五升小麥七升石膏三兩末綿裹之以水一斗五升煑取七升一服一升盡喫即差也

又方生葛根汁二升好豉一升梔子三七枚茵陳切

一升水五升煑取三升去滓內葛汁分為五服

又方金色脚雞雌雞血在治如食法熟食完飲汁令盡不過再作亦可下少鹽豉佳

治毒攻手足腫疼欲斷方用虎杖根剉煮過寒溫

以漬足令踝上有赤許水止之

又方以稻穰灰汁漬足

又方酒煮苦參以漬足差

又方鹽豉及羊屎一升搗令熟以漬之

又方細剉黃蘗五斤以水三斗煮漬之亦治攻陰腫

痛

又方作坎令深三赤少容兩足燒坎令熱以酒灌坎中着履踞坎中壅勿令泄

又方煑羊桃汁漬之雜少鹽豉尤好

又方煑馬矢若羊矢汁漬

又方猪膏和羊矢塗之亦佳

又方以牛肉裹腫處腫消痛止

又方搗常思草絞取汁以漬足

又方猪蹄一具合葱煑去滓內少鹽以漬之

毒病下部生瘡者燒鹽以溼導之不過三

又方生漆塗之綿導之

又方大炷艾灸下部此謂窮無藥

又方取蠟三升以水五升得二升半盡服之

又方煑桃皮煎如糝以綿合導之

又方水中行菜搗綿塞導之日五易差

又方榨皮櫛皮合煑汁如粘糖以導之又濃煑桃皮

飲之最良

又方搗蛇每汁服三合日三水漬烏梅令濃并內崖

蜜數數飲

若病人齒無色舌上白或喜睡眠憤憤不知痛痺處

或下痢急治下部不曉此者但攻其上不以下為
意下部生蟲食其肛肛爛見五臟便死治之方
取雞子白內漆合攪還內殼中仰頭吞之當吐蟲
則愈

又方燒馬蹄作灰細末豬脂和塗綿以導下部日數
度差

又方桃人十五枚苦酒二升益一合煮取六合服之
又方燒艾於管中薰之令煙入下部中少雄黃雜妙
此方是溪溫故亦兼取彼治法

又有病蠶下不止者烏頭二兩女萎雲實各一兩桂

二分蜜丸如桐子水服五丸一日三服

治下部卒痛如鳥啄之方赤小豆大豆各一升合搗
兩囊貯蒸之令熟更平坐即愈

此本在雜治中亦是傷寒毒氣所攻故凡治傷寒方
甚多其有諸麻黃葛根桂枝柴胡青龍白虎四順四
逆二十餘方並是至要者而藥難盡備且診候須明
悉別所在撰大方中今唯載前四方尤其是急瀉者耳
其黃膏赤散在辟病條中預合初覺患便服之傷寒
時行溫疫三名同一種耳而源本小異其冬月傷於
寒或疾行力作汗出得風冷至夏發名為傷寒其冬

月不甚寒多暖氣及西風使人骨節緩墮受病至春發名為時行其年歲中有癘氣兼挾鬼毒相注名為溫病如此診候並相似又貴勝雅言總名傷寒世俗因號為時行道術符刻言五溫亦復殊大歸終止是共途也然自有陽明少陰陰毒陽毒為異耳少陰病例不發熱而腹滿下痢最難治也

附方

必效方治天行一二日者麻黃一大兩去節以水四升煮去沫取二升去滓著米一匙及豉為稀粥取強一升先作熟湯浴淋頭百餘梳然後服粥厚覆

取汗於夜最佳

梅師方治傷寒汗出不解已三四日胃中悶吐豉一升鹽一合水四升煎取一升半分服當吐

聖惠方治傷寒四日已嘔吐更宜吐以苦參末酒下

二錢得吐差

又方治時氣熱毒心神煩燥用藍澱半大匙以新汲水一盞服

又方治時氣頭痛不止用朴硝三兩搗羅為散生油調塗頂上

又方治時氣煩渴用生藕汁一中盞入生蜜一合令

勻分二服

勝金方治時疾熱病狂言心燥苦參不限多少炒黃色為末每服二錢水一盞煎至八分溫服連煎三服有汗無汗皆差

博濟方治陰陽二毒傷寒黑龍丹舶上硫黃一兩以柳木槌研三兩日巴豆一兩和殼記箇數用二升鐺子一口先安硫黃鋪鐺底次安巴豆又以硫黃蓋之醃醋半升已來澆之蓋子蓋合令緊蜜更以濕紙周回固濟縫勿令透氣縫紙乾更以醋濕之文武火熬常著人守之候裏面巴豆作聲數已半

為度急將鐺子離火便入臼中急搗令細再以少米醋并蒸餅少許再搗令冷可丸如雞頭大若是陰毒用椒四十九粒蔥白二莖水一盞煎至六分服一丸陽毒用豆豉四十九粒蔥白二莖水一盞同煎吞一丸不得嚼破

孫用和方治陽毒入胃下血頰疼不可忍鬱金五箇大者牛黃一皂莢子別細研二味同為散每服用醋漿水一盞同煎三沸溫服

孫兆口訣治陰毒傷寒手足逆冷脉息沉細頭疼腰重兼治陰毒欬逆等疾方

川烏頭乾薑等分為麤散炒令轉色放冷再搗為細散每一錢水一盞益一撮煎取半盞溫服

又方治陰勝隔陽傷寒其人必躁熱而不欲飲水者是也宜服霹靂散附子一枚燒為灰存性為末蜜水調下為一服而愈此逼散寒氣然後熱氣上行而汗出乃愈

聖惠方治陰毒傷寒四肢逆冷宜熨以吳茱萸一升酒和勻濕絹袋二隻貯蒸令極熱熨脚心候氣通暢勻暖即停熨累驗

唐崔元亮療時疾發黃心狂煩熱悶不認人者取大

括樓一枚黃者以新汲水九合浸淘取汁下蜜半大合朴消八分合攪令消盡分再服便差

外臺祕要治天行病四五日結胃滿痛壯熱身體熱苦參一兩剉以醋二升煮取一升二合盡飲之當吐即愈天行毒病非苦參醋藥不解及溫覆取汗愈

又方救急治天行後嘔逆不下食食入即出取羊肝如食法作生淡食不過三度即止

又方以雞卵一枚煮三五沸出以水浸之外熟內熟則吞之良

聖惠方治時氣嘔逆不下食用半夏兩湯浸洗七
遍去滑生薑一兩同剉碎以水一大盞煎至六分
去滓分二服不計時候溫服

深師方治傷寒病嘔不止半夏熟洗乾末之生薑湯
服一錢七

簡要濟衆治傷寒咳噫不止及噦逆不定

香一兩乾柿蒂一兩焙乾搗末人參煎湯下一錢
無時服

外臺祕要治天行毒病衄鼻是熱毒血下數升者好
墨末之雞子白丸如梧子用生地黃汁下一二十

丸如人行五里再服

又療傷寒已八九日至十餘日大煩渴熱勝而三焦
有瘡膿者多下或張口吐舌呵吁目爛口鼻生瘡吟
語不識人除熱毒止痢方

龍骨半斤碎以水一斗煮取四升沉之井底令冷
服五合漸漸進之恣意飲充宜老少

梅師方治熱病後下痢膿血不止不能食

白龍骨末米飲調方寸匕服

食療治傷寒熱毒下血羚羊角末服之即差又療疝
氣

聖惠方治傷寒狐惑毒蝕下部肛外如蠶痛痒不止
雄黃半兩先用瓶子一箇口大者內入灰上如裝
香火將雄黃燒之候煙出當病處熏之

又方主傷寒下部生蠶瘡用烏梅肉三兩炒令燥杵
為末煉蜜丸如梧桐子大以石榴根皮煎湯食前

下十九

外臺祕要方崔氏療傷寒手足疼欲脫取羊屎糞汁
以灌之差止亦療時疾陰囊及莖熱腫亦可煮黃
藥等洗之

梅師方治傷寒發豌豆瘡未成膿研芒消用猪膽和

塗上效

經驗後方治時疾發豌豆瘡及赤瘡子未透心煩狂
燥氣喘妄語或見鬼神

龍腦一錢細研旋滴猪心血和丸如雞頭肉大每
服一九紫草湯下少時心神便定得睡瘡復發透
依常將息取安

藥性論云虎杖治大熱煩燥止渴利小便壓一切熱
毒暑月和甘草煎色如琥珀可愛堪著嘗之甘美
瓶置井中令冷徹如水白瓷器及銀器中貯似茶
啜之特人呼為冷飲子又且尊於若能破女子經

候不通搗以酒浸常服有孕人勿服破血

治時氣病起諸復勞方第十四

凡得毒病愈後百日之內禁食猪犬羊肉并傷血及肥魚又膩乾魚則必大下痢下則不可復救又禁食麩食胡蒜韭薤生菜蝦鮑輩食此多致復發則難治又令到他年數發也

治篤病新起早勞及食飲多致欲死方

燒鱉甲服方寸七

又方以水服胡粉少許

又方粉三升以煖水和服之厚覆取汗

又方乾蘇一把水五升煮取二升盡服之無乾者生

亦可用加生薑四兩豉一升

又方鼠矢兩頭尖者二七枚豉五合以水三升煎半

頓服之可服溫覆取汗愈有麻子入內一升加水

一升彌良亦可內枳實蔥白一虎口也

又方取伏雞子殼碎之熬令黃黑細末熱湯服一合

溫覆取汗

又方大黃麻黃各二兩梔子八十四枚豉一升水五

升煮取三升分再服當小汗及下痢

又方濃煮甘皮服之蘆根亦佳

覺多而發復方燒飯篩末服方寸匕良

治交接勞復陰卵腫或縮入腹腹中絞痛或便絕方

燒婦人月經衣服方寸匕

又方取狔子一枚撞之三十六放於戶中逐使喘極

乃刺脇下取血一升酒一升合和飲之若卒無者

但服血慎勿便冷應用狔狔

又方取所交接婦人衣覆男子上一食久活之

又方取狔狔脰及血和酒飲之差

又方刮青竹筴二升以水三升煮令五六沸然後絞

去滓以竹筴湯溫服之此方亦通治勞復

又方礬石一分消三分末以大麥粥清可方寸匕三

服熱毒隨大小便出

又方取蓼子一大把水接取汁飲一升乾者濃取汁

服之蔥頭搗以苦酒和服亦佳

又方蛭蚓數升絞取汁服之良

若差後病男接女病女接男安者陰易病者發復復

者亦必死

卒陰易病男女溫病差後雖數十日血脉未和尚有

熱毒與之交接者即得病曰陰易殺人甚於時行宜

急治之

令人身體重小腹急熱上腫胃頭重不能舉眼中生
膿膝脛拘急欲死方

取婦人禪親陰上者割取燒末服方寸七日三小
便即利而陰微腫者此當愈得童女禪亦良若女
病亦可用男禪

又方鼠矢兩頭尖者二七枚藍一把水五升煮取二
升盡服之溫覆取汗

又方蛭蚓二十四枚水一斗煮取三升一服仍取汗
並良

又方末乾薑四兩湯和頓服溫覆取汗得解止

又方男初覺便矣陰三七壯若已盡甚至百壯即愈
眼無妨陰道瘡復常

兩男兩女並不自相易則易之為名陰陽交換之謂
也

凡欲病人不復取女人手足爪二十枚又取女中下
裳帶一尺燒灰以酒若米飲服之

大病差後小勞便鼻衄方

左顧牡蠣十分石膏五分搗末酒服方寸七日三
四亦可蜜丸服如梧子大服之

大病差後多虛汗及眼中流汗方

杜仲牡蠣分等暮卧水服五七則停不止更作
又方甘草二兩石膏二兩搗末以漿服方寸七日二
服差

又方龍骨牡蠣麻黃根末雜粉以粉身良

又差復虛煩不得眠眼中瘡疼懊懷鼓七合烏梅十
四枚水四升先煮梅取二升半內鼓取一升半分
再服無烏梅用梔子十四枚亦得

又方黃連四兩芍藥二兩黃芩一兩膠三小挺水六
升煮取三升分三服亦可內乳子黃二枚

又方千里流水一石揚之萬度二斗半半夏二兩洗

之秫米一斗茯苓四兩合煮得五升分五服

附方

梅師方治傷寒差後交接發動困欲死眼不開不能

語方

梔子三十枚水三升煎取一升服

治瘴氣疫癘溫毒諸方第十五

辟瘟疫藥干散大麻人栝子人乾薑細辛各一兩附
子半兩炮搗篩正旦以井華水舉家各服方寸七
疫極則三服日一服

老君神明白散木一兩附子三兩烏頭四兩桔梗二

兩半細辛一兩搗篩正旦服一錢七一家合藥則一里無病此帶行所遇病氣皆消若他人有得病者便溫酒服之方寸匕亦得病已四五日以水三升煮散服一升覆取汗出也

赤散方牡丹五分阜茨五分炙之細辛乾薑附子各三分肉桂二分真珠四分躑躅四分搗篩為散初覺頭強邑邑便以少許內鼻中吸之取吐溫酒服方寸匕覆眠得汗即差晨夜行及視病亦宜以許以內粉粉身佳牛馬疫以一匕著舌下溺灌日三四度甚妙也

度瘴散辟山瘴惡氣若有黑霧鬱勃及西南溫風皆為疫癘之候方

麻黃椒各五分烏頭三分細辛木防風桔梗桂乾薑各一分搗篩平旦酒服一盞七辟毒諸惡氣冒霧行尤宜服之

太乙流金方雄黃三兩雌黃二兩礬石鬼箭各一兩半殺羊角二兩搗為散三角絳囊貯一兩帶心前并門戶上月旦青布裹一刀圭中庭燒溫病人亦燒燻之即差

辟天行疫癘雄黃丹砂巴豆礬石附子乾薑分等搗

蜜丸平旦向日吞之一丸如胡麻大九日止令無病

常用辟溫病散方真珠肉桂各一分貝母三分熬之
雞子白熬令黃黑三分搗篩歲旦服方寸匕若歲
中多病可月月朔望服之有病即愈病人服者當
可大效

虎頭殺鬼方虎頭骨五兩朱砂雄黃雌黃各一兩半
鬼臼阜茨蕪蕪各一兩搗篩以蠟蜜和如彈丸絳
囊貯繫臂男左女右家中懸屋四角月朔望夜半
中庭燒一九一方有菖蒲藜蘆無虎頭鬼臼阜茨

作散帶之

趙泉黃膏方大黃附子細辛乾薑椒桂各一兩巴豆
八十枚去心皮搗細苦酒漬之宿臘月猪膏二斤
煎三上三下絞去滓蜜器貯之初覺動色使熱如
梧子大一丸不差又服亦可火炙以摩身體數百
遍佳并治賊風走遊皮膚並良可預合之便服即
愈也

單行方術西南社中栢東南枝取暴乾末服方寸匕
立差

又方正月上寅日搗女青屑三角絳囊貯繫戶上帳

前大吉

又方馬蹄木搗屑二兩絳囊帶之男左女右

又方正月朔旦及七月吞麻子小豆各二七枚又各二七枚投井中又以附子二枚小豆七枚令女子投井中

又方冬至日取雄赤雞作腊至立春煑食盡勿分他人二月一日取東行桑根大如指懸門戶上又人帶之

又方埋鵲於園前

斷溫病令不相染著斷髮仍使長七寸盜著病人卧

蒂下

又方以繩度所住戶中壁屈繩結之

又方密以艾灸病人床四角各一壯不得令知之佳也

又方取小豆新布囊貯之置井中三日出舉家男服十枚女服二十枚

又方桃木中蟲矢末服方寸匕

又方鮑魚頭燒三指撮小豆七枚合末服之女用豆

二七枚

又方熬鼓雜土酒清常將服之

又方以鯽魚密致卧下勿令知之

又方栢子人細辛糝米乾薑三分附子一分末酒服
方寸七日服三服十日

又方用麥蘗服糝米乾薑又云麻子人可作三種服之
附方

外臺祕要辟瘟方

取上等朱砂一兩細研白蜜和丸如麻子大常以
太歲日平旦一家大小勿食諸物面向東立各吞
三七丸永無疾疫

葛仙翁肘後備急方卷之二